

吾

學

編

建文遜國臣記第四卷

吾學編第五十五

海鹽鄭曉

開國公常昇

常昇開平王仲子也兄茂洪武二年以父功封鄭國公二年從宋國公馮勝出塞征納哈出茂本勝婿勝言茂驚潰納哈出衆降人械送京師茂亦言勝短上召勝還奪總兵印罷朝請茂安置龍州上念開平王功二十一年封昇開國公懿敬皇太子妃昇姊也靖難兵至浦子口昇及魏國公分道出戰衆散金川門失守昇見文皇得不死昇子

繼祖坐事謫雲南臨安永樂二年召至京賞鈔幣  
遣歸謫所繼祖六子長寧寧子復弘治五年詔錄  
太廟元祀功臣後復得爲南京錦衣衛世指揮使  
卒子經嗣老子鳳卒子玄振嗣嘉靖十年進劄基  
侑享太廟并議常李鄧湯四王後十一年續封玄  
振懷遠侯

越雋侯俞通淵

俞通淵父河間郡公廷玉兄統國忠烈公通海南  
安侯通源通淵以父兄故克叅將侍舍人從大將  
軍征秦隴燕趙功陞督府僉事征哈刺哈至捕魚

兒海獲酋長人畜尋轉餉江西克偏將征都勻龍  
場諸蠻克辰沅寶慶俘獲多封越嵩侯統兵討建  
昌叛賊城越嵩二十六年坐累奪侯還鄉建文元  
年召見上壯之曰老將也授豹韜衛指揮使克  
偏將從大將軍禦靖難兵敢戰有功白溝河之役  
諸將兵大敗通淵遂歿於陣子翊先卒次靖嗣官  
二年卒次端又明年優給錦衣未幾卒靖難後家  
人懼禍不敢言襲替事建文時諸將校多失世官  
也

駙馬都尉梅殷

梅殷歸德人汝南侯思祖從子洪武十一年尚寧國公主爲駙馬都尉恭謹有謀能騎射諸駙馬中高皇尤愛殷嘗受密命輔建文君靖難兵起殷克總兵官鎮守淮安悉心防禦 文皇假道殷割使人耳鼻口授詞答 文皇曰留汝口與殷下言君父恩義 文皇竟不得道淮安乃渡泗水破盱眙出六合至京師即帝位殷尚擁重兵淮上 上迫公主招殷公主嚙指血爲書付李中使至殷殷得書慟哭詢建文君所在中使曰去矣殷曰君存與存君亡與亡吾姑忍俟之乃還京見 上上曰駙

馬勞苦曰勞而無功永樂二年命衛其陳瑛言  
殷招藏亡命私匿胡人與女秀才劉氏朋邪詭說  
幾得罪明年冬入朝殷讐家都督譚深指揮趙曦  
令人擠殷死笄橋下曦又誣殷自投水死都督許  
成發其事 上怒罪深曦二人對曰此 上命也  
柰何殺臣 上大怒立命力士持金瓜落二人齒  
斬之謚殷榮定初公主謂 上果殺殷牽衣大哭  
問駙馬安在 上笑曰爲公主踪跡賊無自苦公  
主謹護二子順昌景福 上以順昌爲中府都督  
景福指揮旗手衛僉事賜手書二甥曰朕不念爾

母爾安得至今日二甥後改孝陵衛指揮使宣德  
中與世襲孫純舉進士爲中都副留守或曰公主  
嘗貽書阻靖難兵 文皇不答兵至淮北與公主  
書言與歸不得已故令遷居太平門外勿罹兵禍  
公主亦不答公主 高皇后長女后二女次適歐  
陽繪倫犯茶馬禁死

長與族耿炳文

耿炳文濠人父君用取滁和積功爲管軍總管克  
采石取金陵丙申與士誠戰買勇先登死炳文代  
領其軍明年取廣德長興擒士誠守將降其兵會

立元帥府長興以炳文爲總兵都元帥辛丑敗土  
誠將李伯昇追斬五千餘級拜指揮使吳元年破  
蘇州陞大都督府僉事洪武初授鎮國上將軍兼  
右率府副使二年陝西鎮守三年授秦王府左相  
兼陝西行省右丞封長興侯食祿千五百石與世  
券十四年破虜北黃河復還陝西二十四年賜鑑  
鈔造第鳳陽葺先塋贈君用爲侯二十五年兩當  
妖人作亂總兵討三年平之三十年克征西將軍  
勦平蜀盜三十一年鎮守遼東建文元年靖難兵  
起炳文爲征虜大將軍率衆二十萬北進至真定



都督徐凱兵十萬駐河間都督潘忠楊松營漢州  
先鋒至雄縣 文皇出炳文不虞破其城忠松引  
衆來援伏兵起忠等皆被執因得炳文虛實遂長  
驅至真定張玉朱能譚淵來戰炳文大敗奔遼澤  
沱河東炳文衆尚數萬復戰衆皆潰降副將駙馬  
李堅都督竊忠顧成都指揮劉遂俱被執炳文固  
守真定靖難兵攻成二日不能下而去炳文老將  
善戰至是敗建文君始有憂色召還遣李景隆代  
炳文竟至於亡永樂二年刑部尚書鄭賜左都御  
史陳瑛劾炳文衣服黽皿僭飾龍鳳玉帶僭丹韞

上曰炳文先朝老臣亦爲此其速改炳文大懼暴卒洪熙初盡以長興侯田舍賜留守郭鑑云子璿獄別有傳瑄散騎舍人擢尚寶卿後皆獲罪死

駙馬都尉耿璿

耿璿長興侯之子洪武中爲前軍都督僉事尚懿文太子長女江都郡主建文元年郡主進封公主璿爲駙馬都尉掌前府事璿勇悍有武略璿難兵起以王室懿親得預聞兵事炳文北行璿力勸直搗北平已而炳文戰數敗璿怏怏抱病時對公主悲泣建文君遜去杜門稱疾竟坐罪死公主復稱

郡王永樂元年春薨卒

灤城侯李堅

李堅武涉人父英開國有功爲驍騎右衛指揮使  
事力戰死烏撒贈指揮使堅尚 太祖第七女大  
名公主爲駙馬都尉嘗與駙馬歐陽倫梅殷陸賢  
賑濟北平建文君即位進公主大長公主堅素負  
才勇充左副將軍從長興侯北進遇靖難兵諸將  
謹備西北靖難兵突擊出不意破西南長興侯大  
敗靖難將丘福又攻子城堅出接戰互有勝負封  
堅灤城侯食祿千五百石與世券已而兵敗漳沅

河薛祿引樂中堅墜馬祿揮刀直取堅堅大呼我  
李駙馬勿殺祿擒堅見 成祖成祖謂爾至親今  
至此柰何械送北平道卒于莊以公主故特宥當  
嗣公主懼禍繳誥券莊流寓南京詩酒終其身公  
主至宣德初卒或曰堅子莊嗣侯謚威壯弟成爲  
中都留守改山東都指揮成子陞世南京衛指揮  
使祿後封陽武侯

安陸侯吳傑

吳傑黔國威襄公子也洪武十八年傑以指揮嗣  
封安陸侯屢出山陝河南北平練兵從征胡二十

七年練兵浙江防倭二十八年有罪令與吳高皆從楊文征龍州立功自贖建文中率師援真定失律喪師謫南寧衛指揮使永樂元年子璟乞嗣正統間再三乞皆不許弘治六年璟孫鐸授詔乞嗣亦不許

歷城侯盛庸

盛庸不知何許人靖難兵起克叅將從長興侯數失利長興侯召還庸又從曹國公轉戰燕齊間互有勝負建文二年七月鐵鉉守濟南靖難兵圍急庸夜出劫戰晝憑城禦防盡毀靖難諸攻具捷聞

即軍中陞鉉兵部尚書封庸歷城侯食祿千石充  
平燕將軍總兵官代曹國公鉉叅贊軍務是年十  
二月戰東昌殺張玉三年三月大戰于夾河殺譚  
淵再戰敗走德州欲搗北平靖難兵長驅至淮上  
四年春夏間庸南趨靈壁齊眉山戰皆敗次於淮  
南六月靖難兵至浦口庸出高資港又戰敗靖難  
後勅庸曰比以山東未定命卿鎮守淮安今鐵鉉  
就獲諸郡悉平朕念山東久困兵革憊於轉輸卿  
宜輯兵養民以稱朕意永樂元年致仕千戶王欽  
劾庸罪狀陞欽指揮同知賞銀百兩未幾都御史

陳瑛劾庸口出怨言懷異圖請誅庸遂削爵庸暴卒今英國公新寧伯即玉淵後也

江陰侯吳高

吳高父良開國有功封江陰侯卒贈謚江國襄烈公高歷官前軍署都督僉事洪武十七年嗣侯屢出山陝北平河南練兵從征胡二十八年有罪調征趙宗壽靖難兵起高總兵守遼東與楊文數以遼東兵攻永平 文皇曰高雖怯行事差密文勇而無謀去高文不足慮也遣人遺二人書盛譽高極詆文故易其函投二人所二人得書並聞建文

君竟疑高削爵徙廣西獨命文守遼東竟敗靖難  
後召高鎮守大同高上言禦虜方略永樂十二年  
被勅編氓江陰十七年奪券洪熙元年 上曰高  
往年多行無禮謫戍海南高即死徙其家會赦得  
釋宣德十年子昇乞嗣不許

都督耿璈

耿璈長興侯仲子累官至後軍都督僉事靖難兵  
起與江陰侯吳高及楊文率遼東兵圍永平不克  
退保山海關吳高被間奪兵徙廣西楊文守遼東  
璈數請攻永平以動北平文不聽靖難後璈論死



都督劉貞

劉貞合肥人開國功累陞左軍都督克大寧總兵  
官修懷來城池攻左軍靖難兵起貞及陳亨卜萬  
引大寧軍出松亭關營沙河欲復遵化亨有貳心  
文皇入大寧盡擿其軍以行遂入松亭關貞夜負  
勅印浮海歸時建文君聞行北平諸將降 文皇  
籍貞家下獄俄貞由海道出福建還京詔釋其家  
靖難後陞左都督鎮遼東恒懷愧憤永樂元年卒  
貞長女 文皇昭順德妃也以故得免於禍次女  
伊王妃

都督趙清

趙清鳳陽人有膂力善用兵洪武中積功官至北平都指揮使陞後軍都督僉事致仕清去北平時常懷隱憂不敢言靖難兵起黃齊諸人薦清帥河南兵守彰德靖難兵至城下遣人招清清對使人曰殿下至京城但出片紙召清清不敢不至今爲朝廷守封疆不敢棄命失職靖難後召清還清遂乞閑不許

都督楊文

楊文倉山人甲辰領神鎗從征功陞右軍都督僉

事世指揮使二十七年充總兵率舟師鎮守太倉  
仍督浙江海船召掌中都留守充總兵率十五萬  
人征廣西築城設奉議南丹潯州慶遠四軍民指  
揮使司三十年遼東練軍屯田充總兵征虜前將  
軍率京師湖廣江西兵征五開擒殺蠻賊建文初  
充總兵部署大寧兵及寧府護軍屯開平靖難兵  
起宋忠敗文移守遼佐吳高時出兵擾北平吳高  
削爵徙廣西文專領遼東建文三年冬文引兵萬  
餘掠薊州殺戮極慘遇劉江兵戰敗指揮王雄七  
十一人皆被執靖難後召文還憐其開國老將得

不死永樂四年卒世羽林右衛指揮使

都督徐凱

徐凱合肥人開國功爲茂州衛指揮使守松潘累立戰功洪武二十六年出掌鹽井衛事征賈哈刺有功又從西平侯沐春討刁幹孟歷陞都督僉事鎮守四川階文官軍叛會都督甯正討平之又克征虜大將軍從沐春討刁幹孟有功建文元年從大將何福征百夷爲副總兵靖難兵起從宋忠北進練兵臨清二年十月吳傑平安守定州盛庸守德州凱及陶銘城滄州爲犄角 文皇自通州直

趨滄州凱大戰不勝入城東門之卒先潰凱及都督程暹都指揮俞琪趙澆胡原李英張傑將校百餘人皆被執 文皇飲凱等酒遣歸凱等謝願留事殿下遣至北平仍其官祿靖難後暴卒建文數年間諸將被執者無慮千人已卯懷來之戰都指揮俞瑱真定之戰都指揮劉璠庚辰白溝河之戰都指揮何清滄州之戰暹琪澆原英傑德州之掠千戶蘇瓌辛巳滹沱河之戰指揮鄧戩陳鵬真定之圍都指揮朱榮定州之戰都指揮花英鄭琦王恭指揮詹忠壬午渡衡水指揮賈榮拔東平指揮

唐璟拔汶上都指揮薛鵬渦河之戰胡騎都指揮  
林帖木兒火耳灰哈三帖木兒夢兒里淮河之戰  
守將丁良朱彬指揮王貴等一百八十餘人

建文遜國臣記第五卷

吾學編第五十六

海鹽鄭曉

翰林修撰王叔英

王叔英字原采黃巖人初從外姓陳篤志力學洪武中與楊太中葉見大方孝孺林右並徵至京辭還鄉二十年薦起家仙居訓導三十年改海安府學陞漢陽知縣建文元年孝孺欲復井田叔英貽書力阻之其略曰天下之事固有行於古而亦可行於今者亦有行於古而難行於今者夏時周冕之類此行於古而亦可於今者也井田封建之類

可行於古而難行於今者也可行者行之則人之從之也易難行者而行之則人之從之也難從之易則民樂其利從之難則民受其患此君子之用世貴得時措之宜也召爲翰林修撰上資治八策曰務問學曰謹好惡曰辨邪正曰納諫爭曰審才否曰慎刑賞曰明利害曰定法制皆援証今古可見行事又曰太祖除奸剔穢抑強鋤梗如醫去病如農去草去病急或傷體膚去草嚴或傷禾稼是故體膚病去則宜調燮其血氣禾稼草去則宜培養其根苗靖難兵至淮上游兵逼江干建文



遣使四出募兵叔英奉詔行至廣德聞建文君遜位慟哭會齊太奔叔英曰太貳心矣急擒太至密問之故乃相抱慟哭與太且首後舉已而知事不可爲沐浴衣冠書絕命詞藏裾間自經於玄妙觀銀杏樹下詞曰人生寄壤間忠孝貴克全嗟余事君父自省多過愆有志未及竟奇疾忽見纏肥甘空在案對之不能嚙意者造化神有命歸九泉嘗念夷與齊餓死首陽煎周粟豈不佳所見良獨偏高蹤邈難繼偶爾無足傳千秋史官筆慎勿稱希賢又題其案曰生旣久矣未有補於當時死亦徒

然庶無慚於後世 文皇登極治奸黨妻金安人  
繫獄死二女赴井死叔英將死移書祠山道士盛  
希年葬我祠山麓希年天台人收葬叔英墓在州  
城西五里許正統中楊士奇題其墓曰嗚呼翰林  
修撰王原采之墓士奇本叔英薦起也成化中州  
守莆田周瑛封植表識其墓嘉靖中編修安福鄒  
守益謫州判官立祠祀之太平知縣曾才漢又建  
忠節祠祀叔英妻及二女有貞烈祠在黃淡巖上  
叔英著有靜學集

翰林編修王艮

王良字敬止吉水人建文元年江西發解第一明年舉禮部廷試策最優以貌不揚易胡靖第一良次之又次李貫並授翰林修撰如洪武十八年故事良初聞靖難兵起輒憂不食日羸憊及渡淮閉門涕泣不已訣妻子服毒死建文君哀其忠遣禮部侍中黃觀諭祭或曰文皇繼統前一日群臣迎附良慟哭不已與妻子訣吾不可復生豈能復顧汝等是夜服腦子死此說非是靖貫皆事文皇永樂初上出建文時群臣封事千餘通令解縉等編閱留軍馬錢糧數盡焚諸言語干犯者因從

容問貫緒等曰爾等宜皆有之衆未對貫獨頓首  
曰臣貫等實未嘗有也上曰爾以是爲美耶食  
思任其事當國家危急時官近侍獨無一言可乎  
朕非惡夫盡心於建文者但惡導誘建文壞祖法  
亂政耳爾等前日事彼則忠於彼今日事朕當忠  
朕不必曲自遮蔽也後貫遷中允坐累繫獄十年  
竟死獄中貫亦吉水人

翰林編修程濟

程濟朝邑人以明經爲岳池教諭岳池去朝邑數  
千里濟寢食在朝邑而治岳池學事不廢建文初

上書言某月某日西北兵起朝廷謂非所宜言繫  
至京將殺濟召入仰面大呼曰陛下且囚臣至期  
無兵臣死未晚遂下獄已而兵果起赦濟以爲翰  
林編修克軍師護諸將北行徐州之捷諸將樹碑  
敘戰功及統軍者姓名濟一夜往祭碑人莫測其  
故後文皇過徐見碑大怒趣左右鐵椎椎碑再  
椎遽曰止止爲我錄碑文來已而按碑族之諸將  
無得脫者濟姓名正椎脫處得免濟曩之祭禳碑  
也淮上諸將敗建文君召濟還京初濟與邑人高  
翔並以明經徵翔厲名節濟好術數翔止濟勿爲

此濟不聽已而有兵事濟又勸翔學我術翔曰我願爲忠臣也金川門破翔招濟同死濟曰我願爲智士也翔竟死之建文君急召濟入問計濟曰天數已定惟可出走免難耳立召僧爲建文君落髮濟從之出每遇險幾不能脫濟以術脫去相從數十年後隨建文君至南京人尚識濟至京莫知所終

衡府紀善周是修

周是修名德以字行江西太和人少孤力學舉明詩爲霍丘學訓導入見高帝問家居何爲對曰

教人子弟孝弟力田 高帝喜擢周府奉祠  
年從王北征至黑山還陞紀善建文元年王有過  
盡逮府吏詔獄是修以嘗諫得免改衡府紀善衡  
王者建文君弟也當是時衡王未之國是修留京  
預修纂翰林好薦達知名士數陳論國家大計及  
指斥用事者誤國用事者怒衆共挫折之是修屹  
不爲動靖難師渡江宮中自焚是修留書其家別  
友人江仲隆解縉胡靖蕭用道楊士奇且付後事  
暮入應天府學自經死年四十九 文帝繼統都  
御史陳瑛言是修不順天命請加追戮 上曰彼

食其祿自盡其心勿問是修內貞外和孝友忠信  
非其義不苟取襟懷坦明灑落而冲澹悠然其學  
自經史百氏下至陰陽醫卜靡不通究爲文未嘗  
締思援筆立就而雍容雅贍詞理條達所著有詩  
小序詩集詩譜論語類篇廣衍太極圖綱常懿範  
通言家訓芻蕘集進思集嘗曰忠臣不以得失爲  
憂故其言無不直烈女不以死生爲慮故其行無  
不果因取先忠節遺事輯爲觀感錄朝夕省覽士  
可嘗爲是修傳語其子曰當時我脫與若父同死  
今誰爲若父傳者



給事中陳繼之

陳繼之字莆田人建文二年進士爲戶科給事中言江南僧道多腴田請人給五畝餘以賦民從之靖難兵起建白多不遜靖難兵入城死之繼之父秀母黃謫戍甘肅道死子徵仔妻姚女進奴京奴沒官第余朝等悉戍邊

給事中韓永

韓永西安人或曰浮山人不知始所自起建文時爲戶科給事永豐軀美髯音吐宏朗每慷慨論兵事建文君喜之靖難後杜門不出召入見不屈死

之

給事中黃鉞

黃鉞字叔揚常熟人以生員薦除宜章典史建文元年舉湖廣鄉試明年進士授刑科給事中陞戶科左改禮科建文三年外艱方孝孺屏左右問曰北兵日南蕪常鎮京師左輔君吳人朝廷近臣今雖去宜有以教我鉞曰三郡惟鎮江最要害守非其人自撤藩籬也鎮江指揮童俊狡猾不可測蘇州知府姚善忠義激烈有國士風能當一面但仁慈有餘而御下太寬此治郡之良才恐不足定亂

然國家大勢不在江南戎馬至此而禦之晚矣孝  
孺因附書善勉以忠孝期戮力王室濟時艱善得  
書與鉞相對慟哭以死自誓鉞就父殯居陂上舊  
廬足跡不入城邑靖難兵至江上善受建文君詔  
總蘓松常鎮嘉興五郡兵勤王以書招鉞鉞即日  
營壘畢遂至善所時俊果以鎮江降靖難後詔暴  
善罪捕善急善麾下許百戶素權詐得親善縛善  
邀賞鉞聞之慟哭遂絕食閉目三日求死家人救  
免或告鉞曰善款服已得宥鉞復瞠目曰吾知善  
決無二心吾且少俟善事定吾獨死未晚脫鉞果

不死吾將下報希直遂復稍稍食是年七月十一日善死報至鉞起登琴川橋西向再拜祀善慟哭日吾與君同受國恩國有難義同許身君今與希直同死因吾忍獨生乎祀畢詒家人歸祭具遂從容整衣冠奮身入水死時虜兵四出捕善黨籍籍言且併錄鉞家親族悉驚伏鉞友人楊福具棺余日夜泣橋側百方求鉞屍不得更數日屍忽自出立水中福慟哭抱起易衣體猶不潰竟成禮葬之屏處福父滌早奇鉞鉞與福共學福亦有古行

給事中龔太

龔大字叔安義烏人九歲而孤母傳躬教之遣就  
外傳日記數千言長自刻勵造詣深遂洪武十九  
年鄉薦明年入太學奉旨閱齊府獄監安東倉盡  
力剔抉吏部策試第一除戶科試給事中建文二  
年遷都給事中 文皇渡江太與妻傳訣曰事至  
此我自分死爾第携幼釋歸否則俱溺井無辱俄  
宮中火起太馳赴爲兵校所執見 文皇金川門  
以非奸籍得釋太自投城以死年三十六太遇事  
剛果有爲以孝友聞狂人擠太池溺幾死閱其病  
狂弗校鄉有巫言人禍福輒驗太至不能出一語

子永吉累官兵部右侍郎改南京大理卿致仕

監察御史曾鳳韶

曾鳳韶廬陵人洪武末年進士建文初爲監察御史會藩王入覲馳皇道入且不拜鳳韶侍班言殿上宜展君臣之禮宮中乃敘叔姪之倫由皇道不拜大不敬建文君曰至親勿問靖難兵起鳳韶使北平請罷兵歸國不報靖難後召復御史不至尋加侍郎召又不至刺血書憤詞襟上曰予生廬陵忠節之邦素負剛鯁之強讀書而登進士第仕宦而至縉衣郎旣一死之得宜可以含笑于地下而

不愧吾文天祥屬妻李子公望曰我死勿易衣遂  
自殺時年二十九李亦守節死

監察御史董鏞

董鏞或作庸不知始所自起亦不知何許人建文  
時爲監察御史諸御史有志節效忠本朝者時時  
會鏞所誓不負此心將校懷貳不力戰者輒置章  
劾之靖難後爲衆所持謂鏞逆黨也論死家徙戍  
邊

監察御史葉希賢

葉希賢監察御史也或曰浙東人或曰起家鄉薦

入臺侃侃自負建文中屢疏言用兵事又嘗劾  
李二大將失律金川門失守又詐藩守門者靖難  
後坐逆黨死之

監察御史魏冕

魏冕吉安永豐人建文時爲監察御史勁直有才  
名靖難兵至有約開門者冕率同僚十八人即殿  
前毆之幾死會輟朝冕及鄒瑾大呼請速加誅臣  
等義不與此賊同生不聽明日宮中火起或謂冕  
宜急迎附冕毅然厲聲曰使吾改臣節必不爲時  
不用柰何徒自壞也靖難後冕自盡法官請追罪



夷其族

監察御史王度

王度字子中歸善人少肆力學問通經史能文學  
爲鄉里師以明經儒士薦起家爲山東道監察  
御史有風裁疏十餘上多見采行靖難兵起度與  
齊黃等調兵食建文二年監會試時李景隆累敗  
退保濟寧以盛庸代之總兵度密陳便宜有東昌  
之捷徵景隆還不誅反用事忌庸并讒度度稍踈  
斥三年夏靖難兵南下益急度請募兵未幾有小  
河之捷勅度勞軍徐州比還鳳陽失守方孝孺與

度書誓死社稷四年秋七月請戍賀州坐語不遜  
夷其族卒年四十七

監察御史甘霖

甘霖懷寧人洪武丁卯鄉薦爲監察御史剛介持  
正敢言中臺推重之靖難後被執求死從容受戮  
子孫相戒不復求仕至今微弱正德中知府胡纘  
宗祀之鄉賢祠

監察御史高翔

高翔朝邑人有文學矜名節洪武中明經徵爲監  
察御史諸所論奏皆國家機要當上心建文時尤

戮力戎事相與激發忠義靖難後上召翔翔服喪服入見大哭語又不遜遂族翔沒其產諸給高氏產者皆加稅曰令世世馬翔也親戚悉戍邊又發其先墓雜犬馬骨焚灰揚之而以其地爲漏澤園

監察御史王彬

王彬字文質兗州東平人洪武中進士起家爲御史巡江淮治揚州靖難兵至彬與指揮崇剛共守揚城指揮王禮欲舉城降彬與剛知之執禮及其黨繫獄彬外禦內防七日不解甲有力士能舉千斤彬常以自隨靖難兵飛書城中有縛王御史降

者官三品左右憚力士莫敢縛彬禮若宗庫賂力士毋誘其子出會彬解甲浴盤中爲千戶徐政張勝所縛昇至城上投靖難兵中不屈死之政遂出禮等于獄與江都知縣張本開城門降正德中揚州祀彬名宦

監察御史鄭公智

鄭公智字叔貞台寧海人力學好古工文辭方孝孺薦之蜀獻王召至成都王與語經史論詞藝公智數稱述河間東平賢行王說之建文初侍孝孺至京尋舉賢良爲監察御史吏事精敏持法不阿

靖難後坐方黨論死

監察御史韓郁

韓郁未詳何許人爲監察御史建文中上書言諸王親則太祖遺體貴則孝康皇帝手足尊則陛下叔父使二蠻在天之靈子孫爲天子而弟與子遭殘戮其心安乎臣每念至此未嘗不流涕也此皆豎儒偏見病藩封太重疑慮太深而至此夫唇亡齒寒人人自危周王繼廢湘王自焚伐虜被推而齊臣又告王反矣爲計者善因兵不舉則禍必加是朝廷執政激之使然燕魯與齊俱矣請後調

兵不下五十餘萬而一矢亡獲謂之國有謀臣可  
乎經營已久軍興輒乏將不効謀士不効力徒使  
中原無辜赤子困於轉輸命不聊生日甚一日九  
重之憂方深而出入帷幄與國事者方且洋洋自  
得彼其勸陛下必削藩國者果何心哉諺曰親者  
割之不斷疎者續之不堅殊有理也陛下不察不  
待十年悔無及矣臣至愚感恩至厚不敢不言幸  
少垂洞鑑興滅繼絕釋代王之囚封植湘王之墓  
還周王于京師迎楚蜀爲周公俾其各命世子持  
書勸燕罷兵守藩以慰宗朝之靈明詔天下撥亂

反正篤厚親親宗社幸甚不聽郁未詳其所終

參軍斷事高巍

高巍遼州人事母蕭至孝蕭老而痼疾巍奉湯藥不懈母亡廬墓蔬食三年洪武十五年應貢入太學十七年以孝行旌尋授前軍督府試左斷事十八年上疏欲墾河南山東北平兵後荒田及抑末技慎選舉惜名器數事上嘉納之後坐斷事不稱旨當罪以議賢謫戍貴州關索嶺仍許姪代役建文右即位上疏陳乞歸田里未幾知州王欽應詔辟巍赴鈔曹上書論政事其一日太祖有文

王純一之德皇后有后妃不妬之行百男君王上  
齊三代分茅胙土先據形勢陝西百二山河其人  
悍勇西隣土番故以藩王之長秦府王之山西表  
裏山河地產良馬其人剛壯所謂山西將者是也  
北近胡虜故以晉府王之燕國雖無名山大川之  
限其南冀州真保順平大名諸府所謂桑土之野  
地里坦平肥沃供賦饒衍北雖沙漠不毛廣蓄馬  
羊其人不耕不蚕皮衣肉食弓馬是務遼金殘元  
籍之興業故以燕府王之四川雖曰西南一隅山  
河阻深玄德諸葛虎視吳魏故以蜀府王之其餘



楚湘齊充寧遼谷代慶肅星羅碁布比之古制  
皆分封過當然 太祖聖意莫不欲護中國而屏  
四夷也今各處親王故多驕逸不法違犯朝制者  
不削則朝廷紀綱不立削之則傷親親之恩此我  
皇上所難處也賈誼曰欲天下之治安莫要於衆  
建諸侯而少其力力少則易使以義國小則無邪  
心真裁制諸侯之良策也以臣愚見莫聽晁錯削  
奪之策當行主父偃下推恩之令秦晉燕蜀四府  
子弟分王於齊充吳楚潭湘齊充吳楚潭湘分封  
於秦晉燕蜀其餘寧遼谷代慶肅等府類比而分

王之少其力而減其地如此則藩王之權不削而自弱矣其賢如河間東平下詔褒賞驕逸不法如淮南濟北者初犯則容之再犯則赦之三犯而不改者當合親王告太廟削其地而廢處之豈有不順服者哉修身齊家宣父明訓睦族和邦帝堯盛德惟皇上覽察焉建文君奇巍會靖難兵起命從李景隆出師叅贊軍務巍後上書言臣願使燕披忠膽大陳義禮曉以禍福及親親之誼遂遣往燕巍自稱國朝處士臣某上言燕國大王其詞曰志慕仲連子善與人排難解紛名世不朽我 太祖

升遐遺詔內外臣民同心輔政我聖明天子嗣登  
寶位誕布維新之政下養老之詔天下感戴奚啻  
考妣朝野皆曰內有聖明君王外有骨肉藩翰帝  
王之治可待不意大王與朝廷有隙張皇三軍抗  
禦六師竟不知其意何出在朝諸臣執言仗義以  
順討逆臣以爲動干戈孰若和解使帝者復帝王  
者復王君臣之義大明骨肉之親愈厚臣所以得  
奉明詔置死度外來見大王欲盡一言求頸血污  
地者稱臣宿許 太祖生當殞首死當結草之願  
也昔周公聞流言即避位居東若大王始知謀逆

者擒送京師或戮而奏聞或解其護衛或質所愛子孫釋骨肉猜忌之疑塞讒賊離間之口不與周公比隆哉慮不及此遂檄遠邇大興甲兵襲疆宇任事者得籍口以爲殿下假誅左班文臣實欲效漢吳王倡七國以誅晁錯爲名家必自毀然後人毀之恐一奸雄豪傑鳩集無賴因時乘釁率衆數萬突起而橫擊之萬一有失大王獲罪先帝矣今大王據北平取密雲下永平襲雄縣掩真定易若建瓴但自興兵以來經今數月尚不能出區區葦爾一隅之地較以天下十五而未有一焉大王將

士殆亦疲矣况朝廷天下無限之師大王以一國有限之衆應之大王同心之士大約不過三十萬大王與我聖天子義則君臣親則骨肉尚生離間之疑况三十萬異姓之士可保終身困迫而死於殿下乎大王信臣言上表謝罪按甲休兵朝廷寬宥再修親好天意順人心和太祖在天之靈亦安矣不然執迷不回僥倖忪事恐與伯夷叔齊泰伯仲雍求仁讓國之義徑庭矣幸而兵勝得成後世公論爲何倘有蹉跌取譏萬世於是時也追復臣言可得乎巍白髮書生蜉蝣微命生死不懼者

但父蒙

太祖教養無能補報洪武十七年旌表

愚臣孝行臣竊自負既為孝子當為忠臣死忠死

孝臣至願也書再上不報景隆兵敗魏自拔南歸

建文二年五月遇鐵鉉於臨邑相持慟哭共誓效

死遂趨濟南守城拒退靖難兵魏賦志喜有曰至

濟南而被圍思張巡之忠堅幸遇知己之鐵相更

從英輩以雲聯若徐將軍之赴赴盛統兵之桓桓

僉憲高公之糾謾大叅宋公之周旋掠陣張都統

之能勇給儲王太守之從權吾道王府校之論議

斯文王肯播之勉旃衆資群策屈力保全盛統兵

者盛庸也餘不可考矣京城破魏繼死驛舍又有  
高不危者仕建文時死義第宣成南海衛或曰不  
危魏字也

行軍斷事錢芹

錢芹字繼忠吳人少好奇節元末以策干諸將不  
遇洪武初辟大都督府掾從中山王出北平絕漠  
而還未幾解職家居二十餘年甘貧樂道姚太守  
虛心求見芹授一冊竟不交一言而退冊中言勤  
王事不知其詳也建文君求直言舉山林巖穴懷  
才抱德之士善薦芹吉安知府薦蕭用道用道授

靖江府直史芹爲戶部司務留中議事尋畧行軍  
斷事從大將軍諮議軍事會清芹入奏事道病卒  
猶條兵事緩急上執政年七十二賜棺歛歸葬黃  
山善後竟勤王

戶部主事巨敬

巨敬平涼人初爲監察御史伉直敢言建文中爲  
戶部主事清慎有聲靖難後被逮責問不屈死之  
夷其族

國子博士黃彥清

黃彥清不知何許人亦不知仕何官建文四年十



二月彥清尚爲國子博士以在駙馬都尉梅殷  
中私謚建文君坐死并逮從子貴池典史金蘭等  
繫獄殷言彥清實不在軍中金蘭等得釋金蘭後  
官至知縣南京故老言建文己卯庚辰間法網踈  
闊道不拾遺有得鈔於衢者輒拂其塵土置高潔  
處以石鎮之而去一時士風朴實尚義者多靖難  
兵入京之夕郎御史給舍四十餘人相與縋城遁  
去詰朝御史以聞 文皇不問已而深山窮谷中  
往往有傭販自活禪寂自居如所謂雪庵和尚者  
其志蓋可悲云或曰黃彥清本大臣出外巡訪

文皇詔至拒不受欲面與復下皆效命顧兵力不足死之或曰王訛爲黃

宗人經歷宋徵

宋徵不知何許人爲宗人府經歷建文時上疏請削罪廢宗藩屬籍諸王聞之皆恨徵徵又嘗與盧振謝昇牛景先數言耿曹諸將失律懷貳心靖難後縛至不屈死并殺其妻子

欽天監副劉伯完

劉伯完不知何許人洪武時重天官之學稍通曆象占步風角者咸得衣食於官凡有征討必選

知天文者從行伯完精於占候又諳回回曆法起  
時人歷官欽天監副靖難兵南下在歷城戾軍中  
從何福戰靈璧敗績被獲釋還竟亡去莫知所終

按察使王良

王良字天性祥符人歷官刑部左侍郎建文三年  
開燕國人罪從末減左遷浙江按察使至浙江謁  
岳鄂王墓誓曰苟愧武穆非人也建文君遜位大  
慟九月詔召良良集臬司諸印私第躊躇未能決  
妻問故曰我分應死未知所以處汝耳妻曰我何  
難君爲男子乃爲婦人謀乎遂 饒良食抱其子

歛歔如廁置其子池旁自投池死良殮妻畢即列  
薪於戶寫遺囑付家人令妾抱幼子往匿某僉事  
家或曰託諸汴商遂舉火閤室自焚死事聞上  
曰死本良分也朝廷印信良不得輒毀良毀印不  
得無罪徙其家於邊台人陳璣私識良死事每談  
及流涕沾襟正德戊寅浙江按察使梁材提學副  
使劉瑞改公署東水鑑亭爲祠祀良

叅政鄭居貞

鄭居貞徽州人或曰閩人父潛國初歷仕潞州同  
知居貞豐頰美姿髯從父官閩中因從貢尚書遊

洪武中以明經舉授鞏昌通判陞禮部郎中建文  
時爲河南試左叅政三年吏民信愛之永樂初坐  
方黨死于南京有閩南集關隴行藁歸來藁隨

藁檜廷藁子孫因留居福州瓜山方孝孺之爲漢  
中教授也君貞嘗以詩送之曰翩翩紫鳳雛羽翮  
備五彩徘徊千仞翔餘音 江海於焉覽德輝濟

濟銛環佩天門何差我群山久相待晨沐晞朝陽  
夜息飲沉瀟如何復西飛去去秦關外岐山諒匪  
遙啄食良自愛終當冀 關庶以鳴昭代

按察副使程本立

程本立字原道系出伊川上世徙杭再徙崇德今  
析同鄉本立少有大志讀書不務章句與海鹽沈  
壽康友善壽康喪父母塋祭以禮敦行誼南臺論  
薦與官力辭不就鄉人稱爲孝隱先生嘗執手告  
本立曰世之學者爭務科舉以經學爲名而無實  
吾所不取子之質近厚年且富當志於聖賢之學  
本立遂篤志修檢就學金華朱克修寓金華最久  
造詣益深國初舉明經秀才洪武九年除秦府引  
禮舍人同秦晉燕府官僚召見奉天門賜馬楮幣  
毋艱去官十三年補周府禮官從三之國大梁二

十年春進長史從王來朝被累謫雲南馬龍他郎  
甸長官司吏目留家大梁從一僕去雲南會死可  
伐煽誘百夷爲逆三十一年本立單騎入夷巢諭  
順逆利害諸酋落威感說歸附是冬諸夷復變帥  
潘沐英張統屬本立行縣典兵事且撫且禦本立  
誓以死濟萬民不避險難山行野宿自楚雄姚安  
抵大理永昌鶴慶麗江往來綏輯民夷稍安二十  
五年英卒本立爲文祭英英宗人重本立請本立  
撰碑記述英功德三十一年奏計入京還鄉應天  
府尹向寶翰林學士董倫薦本立學行政事宜留

中朝徵入翰林克纂修官修 太祖實錄未幾陞  
試左僉都御史授四品散官食正七品俸建文三  
年坐失陪祀調降仍留翰林編纂明年實錄成改  
江西按察副使未至江西開靖難兵入京自縊死  
本立所著有巽隱集後百三十年福建布政使吳  
昂刺於閩壽康洪武庚戌旌表孝子知縣王文禮  
敬之

按察僉事胡子義

胡子義一名志遠刑部侍郎子昭弟也薦辟爲威  
遠訓導歷蜀府典寶山東按察僉事聞兄死僻世



丹徒蜀獻王聞而憐之令削髮為僧子義以親  
體辭有子二人生數歲子義曰吾兄無後天不絕  
吾姓二子當免於難竟棄去莫知所終

按察僉事林嘉猷

林嘉猷名昇以字行台寧海人師同邑王琦琦坐  
累徙雲南嘉猷徒步千里追別又行六千里至漢  
中師方孝孺孝孺得嘉猷鄭叔貝喜曰匡我者二  
子也洪武二十九年以儒士校文四川蜀王訝其  
名字不相蒙更名良顯薦入史館為史官累遷陝  
西按察僉事嘗被召入燕邸最久知二郡王素傾

世子以告孝孺建文君遣錦衣千戶張安持書詣燕許世子王燕燕內使黃儼因間世子計且得行世子竟先發事遂洩靖難後坐方黨逮至京建文四年九月丁亥死之

知府葉仲惠

葉仲惠初名兒以字行臨海人與兄見太夷仲並有文名稱二葉惠仲初任廣武衛知事陞知縣建文初以知縣充史官修高廟實錄二年同考禮部陞知府永樂元年二月坐修實錄時書靖難事爲逆黨論死籍其家時年六十四

知府王璉

王璉字器之日照人通經史尤長於春秋初仕教授坐謫洪武末以賢能薦授寧波知府潔廉平易杜私謁革吏弊政教兼舉璉自奉儉約一日見饌兼魚肉大怒命撤而瘞之號埋羹太守惟痛絕豪武人以故衛吏卒恨璉靖難兵至江上璉造船取海道勤王爲衛吏卒縛至京見文皇文皇問造舟何爲璉徐對曰由海道趨瓜州截路耳文皇亦不怒釋還田里鄞人黃學憲瀾玉贊璉曰富貴不淫患難奚恤神明其心始終一德

知府姚善

姚善字克一安陸人初姓李後復姓居魚鰲善志  
行淳實學識高遠爲諸生時扁讀書所日待旦軒  
會稽唐之淳爲之銘善工詩爲唐相唱和洪武中  
鄉舉歷祁門丞同知廬州重慶所至有能聲三十  
年擢知蘇州府初 上以吳民染夷俗僭靡違式  
繩以重法器訟者更持短長訟蜂起難治善洞達  
政體周悉人情張弛寬密允協時宜數造請郡賢  
考求治道商略民生休戚俗尚淳漓稍因俗救正  
吏民回嚮轉稱大治爲列郡最隱士王賓居陋巷

善往候舍車詣門賓問爲誰曰姚善賓乃開門延  
語及賓報謁面府門再拜而返善自邀還辭非公  
事不敢入又將候韓奕奕避入太湖善歎曰韓先  
生可謂名可聞而面不可見者錢芹自守甚高善  
願見不可得有俞貞木者以明經見重於善月朔  
望必延致學宮講經書訓士一日饋菜於貞木誤  
送芹所芹受之吏覺其誤詣貞木以告貞木曰錢  
先生不苟取與今受不辭必仰府公之賢耳善聞  
之欲往候乃使人先道意芹對使者曰芹誠願見  
公然芹民也禮不可往見于庭若明公弘下士之

風請俟月朔相會於學宮善如期至迎芹置上坐請質經義芹曰此士子之業公今有官守何不詢時務邪善益起敬詰問今日急務芹出授一簡竟不交言而去視之皆戰守制勝之策也善心嘉之時靖難兵已出北平善於是密結鎮常嘉松四郡守訓練民兵相約勤王而薦芹爲行軍司馬建文元年善至京師畫策防禦又從大將軍北行尋還京建文君用漢破七國策賤齊黃于外善言于朝曰人有文武才略可扶顛濟危者反置散地不用今事已狼狽須急召之詢其姓名不對再三詢之

曰奉人才豈有過於黃大卿者遂復召還二人四年詔善兼督蘇松嘉常鎮五郡兵勤王未及戰文皇即位索子澄甚急子澄避善所約共航海善謝曰公可去善不可去公朝臣可四往號召圖興復善職守土義當與城存亡子澄遂去善爲麾下許千戶等縛見文皇詰善曰若一郡守乃敢舉兵抗我邪善厲聲不遜死之時年四十三子節諱成寶縣千戶所幼子繼兄蘇州坐配保兒習匠正德十一年湖廣巡撫秦金祀善鄉賢祠奕潛心理學尤精於醫洪武初累薦不起所著有韓山人集

知府徐安

徐安鄆人洪武中舉人材累官濟南知府調鳳陽靖難兵自儀真趨京師奇兵間道從靈壁出鳳陽渡河安謀知拆浮橋絕舟楫拒守靖難兵竟獲漁舟以濟靖難後放歸田逾年舉遠逸有司上安名得復任居數載鳳陽諸戚里奏安凌宗親疵細民奪莊田 文皇始怒曰朕昔尚爲安所困况若曹乎逮安謫戍雲南

知府黃希范

黃希范不知何許人爲徽州知府政令嚴明士民



信服靖難兵起大修武備金川門失守素服不治  
事後坐與長史程通善嘗共議條上防禦策為錦  
衣邏卒捕去論死籍其家

知府孫鎮

孫鎮合肥人洪武中中制科除度支主事時以課  
程事罪部官鎮諫不宜連坐謫戍雲南尋復官擢  
衛輝知府靖難兵至抗節不附壬午秋謫戍山海  
二十餘年宣德初薦起為上饒縣丞不就自號冲  
玄子

知府陳彥回

陳彥回字士淵莆田人父立誠歸安丞被誣論死  
家破彥回請戍鎮南弟彥困遼東彥回未入滇家  
人多道死比至蜀惟彥回與祖母郭僅存會教又  
弗原監送者憐彥回縱之去顧貧不能歸往依定  
遠知縣黃積良稱黃姓積良罷依南充縣丞于中  
和未幾閩中教諭嚴德政薦彥回明經爲保寧府  
學訓導三考至京承顧問陞平江知縣至平江閱  
十二月 上崩彥回入臨給事中楊惟康薦彥回  
文學廉幹陞徽州知府至徽數月政教一新士民  
感悅建文元年春以循良受上賞是冬郭氏卒承

重徵父老走京乞留會彥回衰經赴闕跪乞得復  
陳姓奪服留徵除彥回戍籍彥回又乞竟服不許  
許襄事蒞郡再疏又不許蒞郭徵郡北十里北山  
之陽彥回視事時走墓下哭甚哀徵人名爲太守  
山彥回恒以亡命冒宗爲愧悒悒不自安屢欲陳  
首輒自籌曰祖母年高即蹉跌奈何隱忍二十餘  
年始得行其志靖難兵至江上彥回糾義勇勤王  
文皇即位械至京死之籍其家

谷府長史劉璟

劉璟字仲璟其父文成太師也弱冠潘濡經傳喜

談兵究極韜略握奇諸書偉貌豐髯議論英發既  
賊葉丁香叛延安侯唐勝宗討之決策於璟破賊  
還薦璟才略 上喜曰璟真伯溫兒矣召見璟謂  
曰朕欲汝日夕左右惟閣門使如儀禮司立百官  
上宣達爲職處爾無此官者遂授之賜第馬衣帶  
金書除奸敵伎四字於鐵簡賜之且命曰百官敢  
有不法汝持此糾正會谷王封宣德府調侍臣曰  
谷王年少誰可羽翼王者謀大臣故忌璟對曰閣  
門使劉璟忠勇果敢可任 上領之授谷府長史  
并勅提調肅遼處寧燕趙六王府事璟嘗至燕

文皇與璟奕璟勝 文皇曰卿獨不少讓我耶璟  
正色曰可讓處璟不敢不讓不可讓處璟不敢讓  
也靖難兵起璟馳還京獻十六策不聽令參議李  
景隆軍事景隆又不聽景隆戰敗璟夜半渡蘆溝  
河米陷馬斃璟力破冰跳躋岸冒雪走良鄉裂趾  
跛行三十里璟子豹自大同赴難越良鄉至涿州  
遇璟翼璟上馬奔還家養疾建文二年璟輿疾赴  
闕進聞見錄千萬言又不聽令璟還家待用明年  
六月建文君遜位璟稱疾不起法官論璟逃叛逮  
至京見 上猶稱殿下且云殿下百世後逃不得

一箇字下詔獄微髮自經死法官希旨綠坐其家上不許得歸塋嘉靖乙酉提學副使萬潮尙像配享文成祠

遼府長史程通

程通字彥亨績溪人祖平謫戍延安通以太學生走闕下上書請還其祖詞懇惻上憐而釋之洪武二十三年舉應天鄉試時遣諸王行邊以封建發策通對拜遼府紀善二十四年從王閱武臨清明年從之國遼西靖難兵起從王渡海來朝進左長史從王之國荊州衛士紀綱者方幸王通輒

辱之朝廷遣人至荊州通上防禦北兵數千言  
文皇即位綱入賀留錦衣衛幸用事乘間言通襄  
有封事指斥遂械通至京論死家人皮邊簿錄其  
家得田數十畝遺書數百卷牯皮數張續溪之程  
最衆幸使者仁恕不旁及

知州蔡運

蔡運南康人貢起家歷官四川叅政清勁直諒不  
諾於俗罷歸復起賓州知州有惠政靖難後論死  
百姓憐而思之

知縣顏伯璋

顏伯瑋廬陵人名瑋以字行聰敏介直能文章建  
文元年賢良徵授沛知縣靖難兵起淮北民終歲  
給軍餉伯瑋征戢有方民不告勞三年六月北兵  
掠濟寧游兵逼沛沛人竄陸伯瑋設法招徠會談  
豐沛軍民指揮司集民兵五千人築堡備禦尋調  
二千人益山東兵是月望日靖難兵攻沛伯瑋遣  
縣丞胡先百夫長邵彥莊聞行至徐告急都督援  
兵竟不至度不能支令其弟瑀次子有爲還曰汝  
歸白大人子職弗克盡矣題詩察院壁曰太守諸  
公鑒此情只因國難未能平丹心不改人臣節青



史誰書縣令名一木豈能支大厦三軍空擬築長城吾徒雖死終無憾望采民艱達聖明是月二十二日夜二鼓靖難兵入東門指揮王顯迎降伯瑋冠帶片堂南拜慟哭曰臣無能報國遂自經死時年五十有爲不忍去復還見父尸遂自刎以從珏脫走濟寧逾月還沛詢邑人知胡先已收葬伯瑋父子於沛南關外乃至徐告伯瑋友人晏璧璧與伯瑋同郡宦於徐因爲伯瑋傳其事言伯瑋善事父母友于兄弟睦於族媼鄉黨稱其六行無異辭以故守令知而薦之及爲沛令數以事至徐又同

督運德州每連牀共食談論慷慨練達機宜深喜  
鄉郡之有人屬縣之得賢長吏也古語云謀人之  
軍師敗則死之謀人之邦國危則亡之若伯瑋寄  
百里之命素志已定視死如歸賢於人遠矣觀此  
璧亦行誼君子也正統中御史彭勗爲伯瑋起墳  
祠祀之

知縣鄭恕

鄭恕字木忠仙居人治尚書能賦詩善書畫好古  
博雅家甚貧釜魚甑塵一介不妄取蕭然斗室日  
與學徒數十人講論經理尚風勁節一時敬嚮寧

波知府禮聘爲昌國訓導未幾陞蕭知縣留心撫  
字民愛敬之建文四年靖難支將王聰攻破蕭怒  
死之年五十六後籍其家二女當配亦死之子濂  
湜姪温汲謫北平種田

理問徐讓

徐讓山西布政司理問不知何許人材氣磊落有  
口辯應募賞書物至北平議和解兵受而不答建  
文四年五月還授衛鎮撫軍前差遣戰歿

縣丞劉亨

劉亨字嘉會廬陵人博通經史洪武十五年以賢

人君子徵辭親老歸養久之復舉經明行修入對  
稱旨命說書華蓋殿尋言事忤執政出爲壽州訓  
導二十一年冬建文君詔求言上言文武並用久  
長之術而六卿秩卑於五府當並爲一品國子祭  
酒師表天下士位不當在太僕下諸武臣子弟他  
日當授之兵宜立學教之使知事上使下禮義之  
道多見採用陞武進丞修學政課農桑恤孤寡表  
節義毀淫祠縣傍作善教坊再思亭風厲民庶訟  
省野闢流亡來歸建文三年賜璽書四年縣民李  
德茂馮阿寶作亂白郡守毋令滋蔓率衆擒首惡

戮之諭降散其黨靖時人遠彼勞以金帛既而在  
言亨昔在建文時上書改舊制又坐他事罷歸亨  
遂杜門不復出有薦亨修永樂大典者力辭疾湖  
廣廣東聘考試官皆不就宣德中監察御史尹崇  
高復言亨學行雖老可爲師表官亨造朝自言年  
將八十不足任教事上曰伏生九十尚傳經八  
十爲教官何不可亨懇辭吏部尚書郭瑾曰孔子  
言老者安之朝廷豈少此一人宜聽還鄉自便得  
歸正統中年八十二卒

縣丞衛健

衛健山西孝義縣丞不知何許人讀儒書達吏事  
膽智過人與徐讓同應募使北平不答健曰願殿  
下熟思之亦不聽還授衛鎮撫與讓並赴軍前差  
遣後戰歿

教授陳思賢

伍性原  
解州人

陳應宗  
曾廷瑞

林廷  
呂賢

陳思賢茂名人質直好義洪武末爲漳州府學教  
授以忠孝行藝勗諸生隨才教誨多所成就 文  
皇靖難詔至慟哭曰明倫之義正在今日遂堅卧  
不出迎率其徒伍性原陳應宗林廷鄒君默曾廷  
瑞呂賢即明倫堂爲舊君哭臨如禮郡人執送京

師思賢暨六生成以身殉或曰死於道嘉靖中提學副使邵銳立祠祀之

教諭王省

王省字子職吉水人洪武五年領鄉薦至京詔免會試命吏部次第擢用省以親老乞歸養尋以文學徵上親試稱旨當殊擢省自陳才薄親老乞便養得浮梁教諭外艱起復改睢陽凡八年又改濟陽靖難兵至省爲游兵所執從容引譬詞義慷慨衆舍省省歸坐明倫堂伐鼓聚諸生謂曰若等知此堂何爲名明倫今且勿多論只說君臣之義

何如省大哭諸生亦哭遂以頭觸柱死女靜適耶  
墨周簿聞靖難兵至濟陽謂父必死三遣人訪竟  
得遺骸歸葬省子植爲夔州通判亦抗節死賊中  
士簿唐子清

唐子清流王簿也不知何許人在浦有善政民愛  
之顏知縣守浦專調兵食一切邊察事皆付子清  
靖難兵執子清欲殺之將兵者欲且留子清不屈  
死

吏目鄭華

鄭華臨海人字思孝洪武十八年進士初授行人



奉使川廣有令名建文元年詿誤謫東平州吏  
靖難兵起謂其妻蕭曰吾義必死柰親老汝少何  
妻泣對曰君能爲國妾獨不能爲君乎乃稱病尋  
醫攜家托友人無錫丞趙次進堅還州州長貳以  
靖難兵且至盡棄城走去華獨率民吏憑城守力  
不支請援山東又不至不食五日而死

典史周縉

周縉字伯紳武昌人以太學生授永清典史廉謹  
攝令事捕蝗弭盜靖難兵起永清地近燕縉極力  
拒守縣民寡弱相帥逃散縉度不可爲懷印南奔

將他圖道關毋喪歸終喪即出科義旅勤王戎器  
數日略具聞南師燔遂去匿民間壬午十月丁巳  
吏部言前北平屬州縣官朱寧等二百九十人當  
皇上靖難時俱棄職遠避宜寘法典命入粟贖罪  
屯戍興州有司遂械縉至京謫興州居數年子代  
還年八十終於家吳文定公嘗爲縉傳以故得獨  
傳寧等竟不可考

典史黃謙

黃謙亦不知何許人以儒生爲沛典史果敢能戰  
下顏知縣禮遇之益効力盡職靖難兵欲執至徐

招降謙不屈死之

盧振

盧振靖難兵起與徐輝祖齊黃謀畫攻守効力爲多靖難兵畏之壬午秋逮至不屈振名數其罪殺之夷其族

牛景先

牛景先禦靖難兵數有功金川門失守景先變姓名易服出走死蕭寺中已而窮治齊黃黨逮景先妻妾發教坊司

周璿

周璿建文中從將校戮力戰守靖難後不屈死之  
妻王氏子蠻兒皆沒官

### 謝昇

謝昇當建文時練兵給餉夙夜効勞靖難後不屈  
死之振景先璿昇皆不知何許人亦不知其始所  
自起任何官或曰璿諸城人

### 龔翊

龔翊字大章崑山人年十七爲金川門守卒建文  
末靖難兵首入金川門翊大哭後還鄉宣德中周  
忱巡撫兩薦爲崑山太倉學官辭不就曰翊仕無

害於義恐負往日城門一慟耳竟隱終身門人私謚爲安節先生

儲福

儲福無錫新安鄉人也洪武初隸燕山衛籍年二十餘頗好義建文末挈母妻逃去文皇即位詔挾購戍卒入伍至燕山福在錄中調曲靖衛復挈母妻以行因仰天哭曰吾雖一介賤卒義不爲叛逆之臣在舟中日夜泣不輟竟不食而死母韓妻范爲營地葬之范時年二十有姿色居貧奉姑甚謹每哭其夫則走山谷中大號不欲聞之姑也官

有聞其寡者欲委禽焉既而聞其事曰此節孝婦也我安忍犯之一日范往澗水邊浣衣見其傍草生若蘇席草因取之織席售養姑姑賴以存姑年七十餘終營葬爲廬于墓傍范年八十餘卒席草遂不生土人義之即其廬葺爲庵集尼居之名崇孝庵

松江同知

松江同知者不知其姓名勤王詔下同知榜募義勇入援極言大義感動人心弁述靖難之兵垂恩違義 文皇既即位械至京磔於市

舉人劉政

劉政字仲理長洲人父有經學爲沛學教諭政聰敏力學治春秋建文元年秋方孝孺試圻府士千五百人題命論語托孤寄命節不可奪章得政卷孝孺喜曰此鳥中孤鳳當虛左處子是科登書二百十四人政第一四年建文君遜位殺孝孺政慟哭不食死之或曰政在永樂中誓不復仕授徒終其身

生員高賢寧

高賢寧濟陽儒學諸生也受學於教諭王眷建文

中貞爲國子生靖難兵攻濟南不下以箭射書城中使丞降賢寧時在城中作周公輔成王論射城外請罷兵靖難後被執文皇曰此作論秀才邪秀才好人命官之賢寧固辭其友紀綱時爲錦衣指揮倖用事勸賢寧就職賢寧拒不聽曰君以軍旅發身余本書生食祿有年於義不可綱言於上得遣歸年九十七卒

建文遜國臣記第五卷終

子履準校正